

蘇淵雷撰



陪都賦大戰雜詩合刻



本書著者其他著述

- | | |
|------------------|---------------------|
| 1 易通 (黃中初版) | 8 宋平子文鈔 (正中初版) |
| 2 宇宙疑謎解答史 (黃中即出) | 9 中國聖哲傳 (正中即出) |
| 3 天人四論 (黃中初版) | 10 民生哲學引義 (商務再版) |
| 4 名理新論 (黃中初版) | 11 民生哲學與土地政策 (正中即出) |
| 5 民族文化論綱 (黃中初版) | 12 經世文綜 (黃中三版) |
| 6 文哲雜纂 (黃中即版) | 13 玄奘 (勝利初版) |
| 7 宋平子評傳 (正中三版) | 14 陪都賦大戰雜詩合刻 (黃中初版) |

116
J226
276

鉢水齋叢書

蘇淵雷著

陪都賦大戰雜詩合刻

黃中出版社印行



3 1761 6327 1

水調歌頭

國鈔水齋主人詩賦卷下

何遜

嵯峨復蕭瑟，高咏動江關。大陸龍蛇飛走，舉目改河山。海上雲
垂波詭，天際雷轟電掣，疊甚此人寰。藉子生花筆，徧爲寫奇觀。
。收遼左，復朝鮮，定台灣。滌蕩神州羶穢，指顧笑談間。作
賦能規班左，詩史兼宗杜老，異幟立吟壇。唾壺曾擊缺，使我啓
心顏。

陪都賦

賦者古詩之流也。詞極於鋪陳，義歸乎諷諭。緣情體物，屈宋鬱其奇思；述事興懷，班張傳以典雅。固體勢之不侔，亦情文之異撰。然東都遺製，幾同類書；南苑名篇，漸多雋語。江山文藻，時會則然。苟詞取清新，義非艱澀，賦之爲體，亦中夏麗則之文，未可廢也。

頃者倭氛東犯，鼎命西來，戾茲重慶，是曰陪都。奮攘夷之聖戰，騰萬衆之歡愉。曠世大典，會於一時，紀盛頌容，烏可無記。僕生逢多難，才謝前良，幸棲止之有託，諒中興之在望，爰攄一得之忱，用稟新都之美。山川人物，旣磊落而英多；土風歲時，豈易地以

增感。言婉而約，可誦可歌，庶聞者益堅必勝之心，而凜其亡之痛云爾。

伊中夏之新都，實巴子之舊域，東浩蕩於雙江，顯崢嶸於萬壑。旣縮轂乎西南，復襟帶兮湘鄂，據江山之上游，會荆秦而鼎足。接塞北之風光，挹海南之水月，東瞻五谿之雲，西映峨眉之雪。鎖三峽於夔門，通棧道乎劍閣，何形勢之扼要，曰設險以守國。

慨東夷之猾夏，旣豕突而鷗張，自龜玉之西遷，倏三度焉星霜。憶龍蟠兮虎踞，窟狐狸而宅犬羊，雖武昌之可望，帳山川以鬱蒼。幸豫開此天府，大復興之後方，旣民殷而物阜，蘊無盡之寶藏。昔秦漢之得此，國日益以隆昌，矧攘夷之大業，發勝利之曙光。

值世亂之無象，民日陷於水火，寇乘機以肆虐，思一霎而焦土。

紛鴟服之掠空，挾爆彈兮如雨，慘血肉以橫飛，燭火光之旋舞。逾咸陽之三月，等彭貝之殘堵，感零落於山邱，付繁華於二炬。民出走以無家，兒悲號而索乳，信羣情之遑遑，惟切齒以目語。

既痛定而思痛，乃慘淡以經營，方有周之洛邑，立陪都以正名。慨長安之不見，指日下兮雲生，別廢墟於夕照，迎燦爛之黎明。始澄繁而汰縉，一衆志以成城，冀金湯之永固，日欣欣以向榮。彼頑寇之凶焰，曾何足損其幽貞，懷仁親以爲寶，將以此而致太平。

夷嘗考諸史乘，天下一場而二益，邈邱陵之起伏，復沃野兮千里。銘通西南之夷，臺遺懷清之址，聞金牛於秦嶺，封碧鷄於滇洱。自

文翁之教化，迄武侯之治理，彪揚馬之詞章，煥三蘇之論議。杜避地以悲秋，陸參軍而詩美，信人文之淵藪，亦山水之奇異。

觀四時之景物，諛變易於晨昏，山終年以凝翠，花逐節而繽紛。豈僅渭川之竹百畝，洞庭之橘千村，芙蓉得主錦邑，荔枝可薦玉盤。迷樓臺於煙雨，隱帆橋於連雲，試春泉於芳谷，動梵鐘於夕曛。登浮圖兮遠望，渺秋色其無垠，哀江南之蕭瑟，并百感而消魂。

更放覽乎六州，方酣爭於金鐵，率土地以食人，孰興廢而繼絕。彼驕冶之花都，忽黯然而失色，何霧窟之英倫，懾飛車而宵匿。雖柏林之強矯，猶陷民於火宅，撼大秦之石柱，震埃及之金塔。極機械之文明，竟相趨於嗜殺，火不戢以自焚，刀代操而自割。

維我中國，正義凜然，以弱禦暴，愈戰愈堅。丁世界之未濟，維新命於戈鋌，遐呼援於有美，邇得助於蘇聯。奠邦基於盤石，奮百戰以無前，佇黃龍而直搗，待勒銘於燕然。方海上之攘擾，幸惕厲以無愆，雖山河之壯固，實德政以爲先。成天下之亹亹，信王道之無偏，補金甌於旣闕，躋康樂於萬年。

二十九年雙十節前夕初稿 三十三年十月寫定 平陽蘇淵雷謹識

齊瘖萬馬嘿關河，祇有寒鷄凍亦歌。研鍊都京稱諷諭，興朝好武待如何。

漢賦氣體騰霧，而辭旨奧衍，至王仲宣爲登樓賦，氣體仍舊而辭取易解，爲漢賦之一變。此桐城吳摯父先生說也。然仲宣賦登樓，篇幅不大，彼固據一時懷士之心，宜其然耳。

淵雷先生此賦，體放漢京而遵辭則近王粲，可謂得其折衷矣。甲申冬日愚弟潘伯應拜讀

大戰雜詩（一九四〇——一九四四年）

我國抗倭，堅持八載，世界大戰，於今四年。感懷紀事，一寓於詩，起巴黎淪陷，迄菲島登陸，凡得三十二首。繼此有作，當以頌體出之，不復限此也。

（一）

十年流水一西東，血染萊茵未斷紅。戊卒枕戈翻舊曲，將軍設險棄前功。花都春冶徒供夢，鐵壘雲閒誤舉烽。莫恨河山英氣盡，馬恩奇蹟久成空。

上次歐戰後，法竭全力築馬奇諾防線，恃爲金湯之固；惜僅沿邊境，致德軍由荷比滲入，不可謂非一大失策也。此次德軍運用坦克車及降落傘戰術，先聲奪人，馬恩河奇蹟，

遂不可再。巴黎陷後，百萬健兒，尙開鎖馬奇諾囊上也。

(二)

浮海雄師一夕臨，丹挪無計付哀吟。長鯨擊水焦銀甲，荒鷺盤空作怪音。絕嶠風寒歸櫂急，盈庭鼎沸惡言侵。倉皇罷相嗟何及，九月危機積已深。

此次歐戰，實始一九三八年之「九月危機」。英相張伯倫飛德，出席慕尼黑會議，正示弱之始也。

挪威戰役，德軍曾用磁怪水雷，以破英艦。投噓聲彈，以亂人心。北海退兵，而張伯倫挂冠去矣。

(三)

荷比傷心古戰場，杞依唇齒費商量。終因假道成刀俎，未必同盟誤主

張。一夕南風晝繼急，廿年歸夢水雲荒。大堤月色渾如舊，又照威廉返帝鄉。

總施用閃電戰術，一夕而覆佔荷比。上次歐戰禍首德皇威廉，嘗寓荷蘭堤畔，聞已被迎返故國云。

(四)

戰禍循環劇可憐，嘉顏越蹶自年年。鴟啼故國春心老，花發紅罌碧血鮮。風雨幾番堅夙約，江山如夢墮荒烟。康邊舊壤遺碑在，拭讀殘文可泫然！

上次戰後，英某詩人作 *In the Flanders* 詩，有「鶯粟花紅遍戰士的墳頭」之句。

康邊森林，爲上次歐戰德法簽訂和約處，曾立碑紀念。此次法敗，中道求和，希特勒故還此地簽約，以示報復。此中情景，今昔判然。

(五)

魯連墨翟義聲高，恥帝非改鬱怒潮。世界殺機生我慢，文明種子託泉刀。金元有國思孤立，鐵血爲緣孰解銷。肯道春秋羞霸業，持危治亂亦人豪。

馬克斯解剖資本主義社會，託始於商品，近代文明，植根於此。

拜金主義風行世界，而美國尤甚，孤立派政策，牽掣羅斯福總統不少，軍火之不禁運，亦其一端。春秋有滅國，桓公不能救，桓公深恥之。美總統之「隔離」政策，終須更進一步耳。

(六)

抗戰三年百鍊鋼，衣冠南渡豈尋常。幽州日淡笳聲咽，歎浦潮回客恨長。剩有神風吹醉夢，枉教舊雨判炎涼。收京蕩虜原非易，甘苦生民要共嘗。

抗戰三年，備嘗艱苦，歐戰起，英美更無暇東顧矣。第一次世界大戰，日人嘗受其賜，
證爲海外神風，此次重來，恐難如意也。

滇緬路封閉，實邱相白圭之玷。我國戰時物價問題，自此嚴重。（以上一九四〇年六
月作）。

（七）

故國西風意渺茫，狂瀾隻手竟誰當。投戈散地親難保，解約臣秦計未
臧。三摘共和傷綠蔓，重頌正朔感紅桑。可憐海外虬髯客，不及延平
據一方。

貝當求和，雖有苦心，終非上計。憲法廢止，而共和國之傳統絕矣。戴高樂有志恢復，
惜尙無用武地耳。

（八）

霧鎖英倫海峽秋，投鞭不斷恨長流。摩空欲擊盤旋久，橫渡徒誇計慮

周。西寺鐘聲驚晚禱，南天烽火失歸舟。雄心短算拿翁在，難遣盈盈一水愁。

英倫狂炸，德艦自沉，爲大戰初期悲劇之一。

希特勒於去歲聖誕日，嘗敘拿翁故事，登布倫高處，遙望英倫三島。

(九)

天陰雨濕舊沙場，百萬生靈葬此鄉。欲得油田充外府，竟教鐵衛變蕭牆。保南無計銷兵火，蘇土真能作主張。一着棋輸關大局，愛琴海水正茫茫。

巴爾幹半島，爲歐洲火藥庫，前次大戰，死傷百萬。羅馬尼亞之亡，起自英衛團之陰謀，德軍遂得攫有油田。蘇土中立，保存世界元氣不少。

(十)

不樹堂堂正正旗，登觀隙動欲何爲。由來五尺羞稱霸，誰道千秋尙可兒。希臘歌哀猶繼響，大秦風邈只荒碑。劇憐豎子成名處，又見銅駝荆棘悲。

○ 以索里尼既以不義併吞阿比西尼亞，復乘法國之危而參戰，巧取豪奪，自炫功名。此次入侵希臘，大受挫敗，世無英雄，遂使豎子成名。行見斜陽古道，終爲後人憑吊資料耳。

(十一)

畢竟施行仁政難，海濱有國調孤彈。先號後笑同人樂，厚往薄來禮數寬。三國參盟增定力，一廬編戶喜居安。公民投票尋常事，僞鼎寧容一例看。

波羅的海三小國，與波芬二國異議，毅然投票，加入蘇聯。固未可與德國在撻臭之僞公

民投票，相提並論也。

(十二)

回首東方欲曙天，安排勝利接新年。攘夷一統思民主，興亞聯盟繼昔賢。至樂莊生成絕唱，大同禮運有新篇。自由獨立真無價，踏血還須共着鞭。

明治維新後，辛亥革命前，中日人士，頗多扶黃興亞之念。要非今日所謂「新秩序」也。（以上一九四一年一月作）

(十三)

玉帛干戈苦未同，又驚劫火絳寒空。長江天塹飛難渡，捷徑中原轉易攻。萬馬銜枚攘黑土，三軍浴血守巍宮。親征力挽垂危局，擊虜猶堪張一弓。

德軍攻英未能，遂背約侵蘇，初勢甚銳，前鋒且莫斯科。烏克蘭世稱黑土，爲歐洲糧倉。克姆林宮係赤色國際之總都，史達林親率三軍守衛，始轉危爲安。

(十四)

史跡推遷總費猜，冰天雪地又徘徊。拿翁初識馬肝苦，魏武終深鷄肋哀。敗退豈全關節候，扶危畢竟仗羣才。蟲沙猿鶴休相較，一例人天劫後灰。

拿翁兵圍莫斯科風雪中，嘗宰凍馬佐酒。此次希特勒自莫斯科敗退，情節差同。

(十五)

世界和平一線微，東西策應合重圍。未遑春季張攻勢，且向南洋發禍機。星使遙同杯酒落，樓船已逐海雲飛。由來豺虎難憑信，君子端方正可欺。

德國屢唱春季攻勢，無力實現，乃唆使日本在南太平洋發動戰事。日使齋藤身在白宮談判，而日機日艦已臨珍珠島，慈爾聞訊，爲之愕然！

(十六)

朦朧巨艦挾風雷，珠島星洲一夕摧。萬里裹糧方六月，廿年築壘剩荒台。波漂上將魚龍杳，戟認當朝海水哀。奔喻兵家爭要着，始知馬服是庸才。

二十年來，英以全力築新嘉坡軍港，號爲鐵壘，日軍從背後侵入，乃不一月而陷。主力艦威爾斯親王號前曾載邱吉爾訪美，抵星幾數日，敵機環攻，一舉而沉，艦長且生死不明。謂非戰略錯誤，疏於防範而何？

(十七)

仙山翠擁定何知，逋客豪家此卜居。海水綠從人浴後，夕陽紅到劫來

初。百年興廢春誰主，一死艱難計已疏。極目南天歌舞地，幾回垂淚聽啼鳥。

香港風光，不滅上海，自割讓英國，以迄陷敵，適值百年。陷後仕女頗多受辱，總督聞亦被俘云。

(十八)

海上戰場三月開，飛車震電萬人哀。椰風椰雨春將暮，鐵鑊金城勢已頽。鼓舞軍容須作氣，評量戰略莫疑猜。盟津且幸千方集，泰誓書成亦壯哉。

馬尼拉宣佈不設防，寇機仍狂炸，軍民死傷至衆。太平洋戰略會議，聞英美頗有隔閡。戰訊惡劣中，二十六國共同宣言在美京發表，亦快事也。

(十九)

吹縹緲河水一灣，華嚴佛國起波瀾。羣思獨立歸心易，吝與兵權効死難。排解元戎勞遠訪，聯盟兄弟喜相安。緬邊何只頻傳捷，大振天聲敵胆寒。

蔣公訪印，實我國傳統外交精神之復活。

(二十)

朝暉初上海雲低，乍化鯢鵬擊水飛。島國沈沈成火宅，江山渺渺入重圍。虛空潑碎纔驚夢，大地昇平此轉機。我爲飛將軍祝福，海天長索凱歌歸。

美機多架，自航艦出發，首襲日本。敵猝不及防，損失甚重。消息傳出，舉世大快。

(以上一九四二年四月作)

(二十一)

赴援無計阻重深，鼓角嚴城士氣森。伏水遙傳欸乃曲，秋風散作雪霜吟。陣開鐵翼千羣急，勢壓雄京萬井沈。料得東山應折屐，還從天海吐幽襟。

斯達林格勒，背伏爾加河，船父曲哀婉動人，爲世所稱。苦鬥三月，未獲解圍，威爾基聘燕，大呼開闢第二戰場。此次德蘇兩戰，西線無戰事，然千架飛機，出動炸德，亦一壯舉。海天寥闊，親訪美蘇，固知邱相心中樂也。

（二十二）

海上戰雲鬱未開，忽傳窮寇竄溫台。虛驚風鶴紛餘子，雄鎮江山孰霸才。野宿萬民勞望眼，鄉愁一夕罷銜杯。天涯久儲思親淚，待向柴門話劫灰。

浙贛戰事，日蹙百里，雖云戰略關係，然生民苦矣。

吾鄉小鎮，亦有敵踪，慈親白髮，思之慘然！

（二十三）

珊瑚島外水雲鄉，棋布星羅好戰場。破虜重圍看兔脫，摩空獨往試鷹揚。沈沙碧海初銷恨，濯足扶桑始舉觴。畢竟亢陽無盛節，金風颯颯報秋涼。

美軍首次殲敵珊瑚島外，所羅門島附近復擊沉敵艦數十，足雪去歲珠島之恥。日海上攻勢，自此逆轉，然最後決勝，終在東京灣外耳。

（二十四）

戰代縱橫風雅存，鹿鳴臺草引清樽。觀光季札能知樂，蹈海仲連善解紛。政事平章歸妙語，江山流覽發奇文。行人自古通詞賦，此是泱泱大國魂。

我國古代最重外交，登高能賦，可爲大夫。近世歐美名流，訪問海外，或登壇雄辯，或樽酒相酬，亦觀風上國，卽席賦詩之意耳。

(二十五)

作蘭春蠶只自憐，百年哀怨瞥雲烟。叩關警夢誰先覺，指日修盟屬後賢。奮迅神州爭獨立，殷勤列國感前愆。坤維乍轉開新運，特筆中華再造篇。

日本通海後我，而維新先成，一躍爲強國。我自鴉片戰役簽訂江寧條約後，奄忽百年，國父遺囑，諄諄改約。今年國慶日，英美首倡廢除舊約，亦我軍民抗戰六年，流血千萬之所賜也。

(二十六)

鐵陣孤軍背水開，邯鄲圍解豁陰霾。胡天八月飛霜早，炎海高秋踏浪

來。拊背先教秦幟亂，沈舟深繫楚人哀。鞭笞六國應知恨，可欠狐鳴，篝火才。

北非轉捷，美軍登陸，蘇聯乘機反攻，而斯城宣佈解圍。土倫法艦，全部自沈，悲壯無比。歐陸諸小國，終當奮起乎？（以上一九四二年十二月作）

（二十七）

橫海鯨波嚙岸深，三年雪恨此重臨。遺民眼盡千行淚，大陸雲收萬里陰。故壘西邊惟赤壁，荒灣宵濟有雷音。九天戰術今猶昔，誰會滄桑歷劫心。

英軍自頓刻爾克撤退後，得美方供應，積極整軍；終於開闢第二戰場，一鼓而登陸諾曼第。東聯西拒，謀而後動，規模之大，前史所無。遂能滿雪前恥，以踐援蘇之約。孫子稱善守者藏於九地之下，善攻者動於九天之上，觀於此次大戰益信。

(二十八)

自由如火復如荼，百萬健兒拍手呼。地下軍能摧勁虜，人間夢稍謝花
都。孤臣海外常懸胆，公子尊前肯向隅。痛定還應思故國，江山意氣
未全粗。

戴高樂經營海外，力竭聲嘶，親訪美京，藉增諒解。此次盟軍登陸，法地下軍蜂起響應，
，先期克復巴黎，戴氏遂得重入凱旋門，緬懷今昔，感慨係之。

(二十九)

寸寸山河泣血漣，來蘇真覺後王賢。能銷萬古無窮劫，全仗同人一念
堅。淨土落花深幾尺，桃源舊夢隔千年。如何至樂無懷世，又到冰天
雪海邊。

蘇聯自斯達林格勒解圍後，乘勝發動攻勢，相繼收復失地，農村都市，積極復興，熙熙

春台，人民又獲自由幸福之生活矣。

(三十)

縹緲何山是也非，龍蛇起陸海羣飛。直教日落金鰲寂，佇待風高遼鶴歸。折戟沈沙摩舊壘，凌空越島赴戎機。東南有美眞堪寄，霧重蒙衝快合圍。

日本爲世界大戰禍首，自九一八之役迄太平洋戰事，皆彼一手造成。近美軍採取越島戰略，塞班關島，先後攻克，遂大舉登陸菲律賓濱，海空大戰，已奪敵人之魄矣。行見大戰終結，仍在長白山頭，鴨綠江邊也。

(三十一)

世局千鈞一髮牽，中原北望又年年。丹心未老天休問，駿骨能招野有賢。冰至履霜驚積漸，寇深急難尙無憊。漢唐立國儀型在，莫賦殘山

剝水篇。

中國戰場未能配合盟軍攻勢，至爲扼腕。要當刷新政治，加強軍事，上效漢唐立國之精神，外迎世界民主之新潮，始克有濟耳。

(三十二)

業運遷流未可知，人天如客誤歸期。天津橋上啼鶻早，夔府城頭落日遲。據亂勞民思盛世，蹉跎青史有微詞。迴旋大宇憑誰力，念念華嚴好自持。

上次戰後，改造世界呼聲甚高，國際聯盟共產國際應運而出，均未成功。近者英史家韋爾斯重唱保障人權改造世界之論，而盟國亦有戰後世界和平機構之集議。然歷史無情，人類未濟，欲求解放，惟依自力耳。(以上一九四四年十月作)

題詞

陳仲陶

戰野龍騰拏，門垓蟻追奔。殺機彌宇宙，機事導其源。風雲入決策，霆電隨炎崑。將謂天柱折，直遣溟渤翻。哀勝驕易竭，屢國轉自存。漫漫此長夜，曷旦希朝暉。吾生丁戰伐，繭足風塵昏。煙莎與簷竹，夢寐江南村。蘇子天人學，文采古疊樽。瀛談寓悲憫，餘事詩史尊。立國自有疆，奚用相并吞。掩卷三歎息，我思墨者言。

中華民國三十四年一月初版（渝）

陪都賦大戰雜詩合刻（全一冊） 售價 元

著 者 蘇 淵 雷

發 行 人 蘇 淵 雷

出 版 者 黃 中 出 版 社


重慶：上清寺郵局隔壁

印 刷 者 京 華 印 書 館

重慶：打銅街廿七號

經 售 處 各 大 書 局

版 權 所 有
翻 印 不 准



533

15-